

Dës Motioun ass bei 29 Jo-Stëmme géint 30 Nee-Stëmmen ofgeleent.

*Ont voté oui : Mmes Diane Adehm, Nancy Arendt épouse Kemp, MM. Emilie Eicher, Félix Eischen, Paul Galles, Léon Gloden, Jean-Marie Halsdorf, Mme Martine Hansen, MM. Max Hengel, Aly Kaes, Marc Lies, Mme Elisabeth Margue, M. Georges Mischo, Mme Octavie Modert, MM. Laurent Mosar, Gilles Roth, Jean-Paul Schaaf, Marc Spautz, Serge Wilmes (par Mme Nancy Arendt épouse Kemp), Claude Wiseler et Michel Wolter ;*

*MM. Jeff Engelen, Fernand Kartheiser, Fred Keup et Roy Reding (par M. Jeff Engelen) ;*

*MM. Sven Clement et Marc Goergen ;*

*Mmes Myriam Cecchetti et Nathalie Oberweis.*

*Ont voté non : Mme Barbara Agostino, MM. Guy Arendt, André Bauler, Gilles Baum, Mme Simone Beissel, MM. Frank Colabianchi, Fernand Etgen, Gusti Graas, Pim Knaff, Claude Lamberty et Mme Lydie Polfer (par M. Frank Colabianchi) ;*

*Mme Simone Asselborn-Bintz, M. Dan Biancalana, Mmes Tess Burton, Francine Closener, MM. Yves Cruchten, Mars Di Bartolomeo, Mme Cécile Hemmen, M. Dan Kersch, Mme Lydia Mutsch et M. Carlo Weber ;*

*Mme Semiray Ahmedova, M. François Benoy, Mmes Djuna Bernard, Stéphanie Empain, Chantal Gary, M. Marc Hansen, Mme Josée Lorsché, M. Charles Margue et Mme Jessie Thill.*

## 10. 8090 – Projet de loi portant création de l'Institut national de l'activité physique et des sports et modifiant la loi modifiée du 29 novembre 1988 portant organisation de la structure administrative de l'éducation physique et des sports

Mir kommen elo zum Projet de loi 8090 iwwert d'Ëmbenennung vun der École nationale de l'éducation physique et des sports, der ENEPS, souwéi d'Moderniséierung an d'Erweiderung vum hire Missiounen. D'Riedezäit ass nom Basismodell festgeluecht. An d'Wuert huet elo d'Madamm Rapportrice vun dësem Projet de loi, déi honorabel Madamm Cécile Hemmen.

### Rapport de la Commission de la Santé et des Sports

**Mme Cécile Hemmen** (LSAP), rapportrice | Merci, Här President. Et ass mer och eng grouss Freed, Iech de Rapport ze presentéiere vum Gesetzesprojet 8090 iwwert den INAPS, den Institut national de l'activité physique et des sports. Voilà, wéi gesot, dat ass d'Ofkierzung INAPS.

De Gesetzesprojet, dee mir haut stëmmen, ass e fundamentale Baustee vun der nationaler Politik am Sport a soll do aushëllefen, wou eebe just d'ENEPS – dat ass d'École nationale de l'éducation physique et des sports – den Erwaardungen an de Besoine vun der Gesellschaft net méi nokomm ass. Grad wéi eng gesond Ernährung gehéieren de Sport an och d'Bewegung zu engem gesonde Liewensstil. Domadder soen ech Iech näischt Neits. Mee den INAPS, dee soll derzou bäidroen, dass wéinstens eng Stonn kierperlech Aktivitéit pro Dag vun all Mënsch gemaach soll ginn. An deem soll een elo hei am Land gerecht ginn.

Dëse Projet de loi ass den 3. November 2022 vum Sportsminister an der Chamber deposéiert ginn. D'Sportskommissioun huet de Projet mat all sengen Annexen dunn den 10. November 2022 kritt. Ouni dass ech elo op all Detail vum Projet aginn – Dir wäert dat am schrëftleche Rapport natierlech erëmfannen –, ass et wichteg, op déi erweidert an déi nei Missioun vum INAPS par rapport zu der ENEPS anzegoen.

D'ENEPS, ech widderhuelen et, dat ass d'École nationale de l'éducation physique et des sports, soll nom Koalitionsaccord an en Institut weiterentwéckelt ginn. An déi Transition ass néideg, wann een d'publizéiert Zuele vun der OMS, also vun der Weltgesundheitsorganisatioun, kuckt, aus deenen ervirgeet, dass ëmmerhin 80 % vun den ageschoulte Jugendlechen déi schonn erwänt Recommendatiounen fir Sport a Bewegung net erfüllen.

D'Transition vun enger École nationale an en Institut féiert zu enger Erweiderung vun de Missiounen. Dobäi kritt den INAPS da folgend Missiounen: fir unzefänken d'Ausbildung an d'Entwécklung vun de Kompetenzen vun den technesch an administrative Kaderen, wouzu och d'Ausbildung vun den Trainere gehéiert, déi dëst beruufs- oder awer studiebegleedend maachen, woubäi dëst och schonn eng fréier Missioun vun der ENEPS war, déi heimat bäibehale gëtt.

*(Coups de cloche de la présidence)*

**M. Fernand Etgen**, Président | Wannechgelift, e bësse méi roueg!

**Mme Cécile Hemmen** (LSAP), rapportrice | Eng nei Missioun ass d'Entwécklung an d'Organisatioun vu Formatiounen fir d'Stärkung an och d'Promotioun vun de pedagogesche Kompetenzen an der Schoul am Beräich vun der Bewegung an dem Sport. Dës Formatiounen gi fir d'Schoulpersonal am Fundamental a fir d'Educatoren organiséiert, mam Zil, den Encadrement an de Schoulen an och de SEA-Strukturen am Beräich vum Sport an der Bewegung ze verbesseren. D'Kollaboratiounen mam IFEN, mam SCRIPT, mam SNJ, mam LTPES souwéi mat der Uni Lëtzebuerg solle bäibehalen an och ausgebaut ginn.

Eng weider nei Missioun ass, dass den INAPS soll derzou bäidroen, d'Beruffer am Sportsmilieu ze entwéckelen, an och hei nees nei Formatiounen mat entwéckele soll. De schouleschen Niveau, deen hei viséiert ass, ass de Secondaire an den Héichschoulerberäich. Et ass net vun der Hand ze weisen, dass den Aarbechtsmarché Demandeur ass fir qualifizéiert Personal am Secteur vum Sport.

Eng immens wichteg nei Missioun ass, dass den INAPS de Sportsfederatiounen soll mat Rot an Dot zur Säit stoen, mee net nëmmen hinnen, mee och de Ministèren, Administratiounen an de Gemengen. D'Institut soll si allegueren dobäi ënnerstëtzen, d'Konzepten, déi am Sport entwéckelt ginn, ëmzesetzen an deelweis och mat ze koordinéieren.

Eng erweidert Missioun ass déi vum Sammelen, Produzéieren, Geréieren an dem Verdeelee vun didakteschem, pedagogeschem souwéi wëssenschaftlechem an techneschem Material am Beräich vun der kierperlecher Bewegung an dem Sport. Dëst Material soll bei de Formatiounen och benotzt ginn. Bei der ENEPS war déi Missioun op d'Zesummestellen an d'Gestioun vun didaktescher Dokumentatioun an och der Ausrüstung limitéiert.

Wat den Auteure vun dësem Projet wichteg war, ass, dass déi national Unerkennung vu lëtzebuergeschen an och auslänneschen Diplomer am Secteur vum Sport och vum INAPS weidergefouert gëtt, esou wéi dat an der Vergaangenheet bei der ENEPS och schonn de Fall war.

Weiderhi soll den INAPS national an och international Initiativen ënnerstëtzen, initiéieren, koordinéieren an ëmsetzen, déi am Beräich vu senge Missiounen leien. An deem Sënn gëtt de Kooperatiounsgedanke gestärkt, fir zesumme mat anere méi Impakt ze kréien an esou déi iwwergeuerdent Ziler vum INAPS, nämlech d'Qualitéitsentwécklung am Sport, méi effizient an och besser ze errechen.

Nieft de Missiounen enthält de Projet weider Dispositiounen. Zum Beispill gesäit den Artikel 3 vir, dass d'Formatiounen, déi fir d'Federatiounen gehale ginn, mat engem Staatsbrevet sanktionéiert ginn an et ausserdeem och méiglech ass, dass den INAPS vu sech aus och Brevete vergëtt. Den Artikel gesäit do vir, dass all Demande fir eng Formatioun vum Mouvement sportif muss un den INAPS direkt adresséiert ginn.

Am Kader vun de Brevete gëtt et en elektronesch Regëster, wou d'Breveten an och d'Staatsbrevete souwéi d'Homologatiounen vun Diplomer an och déi unerkannt Dispense gespäichert solle ginn. An dëse Regëster ass ënnert der Responsabilitéit vum Sportsminister. An dësem Artikel 5 war am Ufank en zweete Paragraf virgesinn, wou d'Durée de conservation am Regëster vun de perséinlechen Donnéeën e Liewe laang sollt kënnen sinn. Duerch eng Opposition formelle vum Staatsrot ass dee Paragraf awer gestrach ginn.

Weider ass am Projet festgehalen, dass den INAPS vun engem Direkter geleet gëtt, dee vum Grand-Duc noméiert gëtt an deen op d'mannst zënter fënnf Joer an der Carrière supérieure vum Staat ass.

Wichteg ass den Artikel 9, dee virgesäit, dass eng consultatif Kommissioun nieft dem INAPS geschaaft gëtt, fir Recommendatiounen an Avisen zu de Missiounen vum INAPS un de Sportsminister ze adresséieren. Virun allem soll dës Kommissioun de Minister berode bei Froen, déi mat de Missiounen vum INAPS ze dinn hunn. D'Zesummestellung vun der Kommissioun soll nach per Règlement grand-ducal gereegelt ginn.

Am véierte Kapitel vum Projet hu mer nach d'finanziell Dispositiounen, wou ënner anerem och festgehalen gëtt, dass d'Formatiounen vum INAPS vun de Kandidaten bezuelt ginn an dass d'Frais d'inscription vum Formatiounsniveau vun all Kandidat ofhänken, awer net iwwer 60 Euro Index 100 kënnen goen.

Aus dem leschte Kapitel ass nach wichteg ervirzehiewen, dass d'Fonctionnairen an och d'Statsemployéë vun der ENEPS an den INAPS mat eriwuergehall ginn an hire Statut och do halen. Hei muss also kee sech Gedanken maachen.

Zum Schluss maachen ech Iech nach e kuerze chronologesche Resümmee vun den Avisen, déi bei eis erakomm sinn. Als Éischt ass dat den Avis vun der Chambre des Fonctionnaires et Employés publics den 12. Dezember 2022, déi sech mam Numm INAPS schwéier deet, dee lichter mam Numm INAP ze verwiesselen ass. Ausserdeem freet si, dass nëmme Persounen mat engem Masterofschloss sollen Accès op den Direkteschposte vum INAPS kréien.

Duerno ass den Avis vun der Commission nationale pour la protection des données de 17. Februar dëst Joer erakomm. Hei geet si op d'Aspekter vum Datenschutz an a bemierkt ënner anerem, dass si net genuch Prezisiounen iwwert d'Kategorië vu Persounen fënnt, deenen hir perséinlech Date vum neie Regëster behandelt ginn.

De Staatsrot huet säin Avis de 25. Abrëll eraginn. Déi héich Kierperschaft stéisst sech nieft der Dauer vum Hale vun de perséinlechen Daten, wéi virdru schonn erwänt, virun allem och un der Formulatioun vun dësem Passage, well doduerch kee klaren Ënnerschied méi tëscht deenen eenzelne perséinlechen Donnéeën erauskënnt.

Als leschten Acteur huet de COSL säin Avis den 10. Mee eragereecht. Den Olympesche Komitee huet verschidde Remarken, och wa si de Projet begreifen. Zum enge wëlle si méi prezis definéiert hunn, wéi d'Responsabilitéiten an och d'Rollen tëscht dem INAPS an hinne gereegelt sinn. Zum anere soll en onofhängegt Institut amplaz vun enger Verwaltung

geschaaft ginn. Si wëilten e méi aktive Rôle an der Kommissioun kennen hunn.

Léif Kollegeen, Här President, Léif Kollegeinnen och, d'Transitioun vun der ENEPS op den INAPS ass genee dee Schrëtt, deen eis Sportswelt brauch. Pedagogesch a professionell nobesseren an déi besteeënd Missiounen erweideren, fir de Besoin an der kierperlecher Aktivitéit an dem Sport gerecht ze ginn, ass e ganz néidegen a kruziale Schrëtt, fir dass de Sport säi gesamtgesellschaftlecht Potenzial ka spillen.

D'LSAP begreist natierlech dëse Gesetzesprojet a gëtt heimadder och hiren Accord. Merci.

**Plusieurs voix** | Très bien!

**M. Fernand Etgen, Président** | Merci villmools der Madamm Rapportrice Cécile Hemmen.

D'Wuert geet elo un den éischten ageschriwwene Riedner, den honorabelen Här Georges Mischo. Här Mischo, Dir hutt d'Wuert.

### Discussion générale

**M. Georges Mischo (CSV)** | Merci, Här President. Här President, Léif Kollegeinnen a Kollegeen, mir als CSV begreissen et, datt mer haut iwwert den Institut national de l'activité physique et des sports, kuerz INAPS, kënnen ofstëmmen. Ech mengen, elo huet jiddweree matkritt, wat INAPS heescht. D'Madamm Rapportrice huet et scho gesot an et wäert bestëmmt nach déi eng oder aner Kéier kommen.

D'Zilsetzung vum INAPS goufe par rapport zu der ENEPS moderniséiert an erwidert, fir esou dem Institut méi Ressourcen ze ginn, fir dem Besoin an der Gesellschaft nozekommen. De Sport ass a bleift e wichtege Pilier, fir déi physisch a gläichzäitig mental Gesondheet vun de Leit kënnen ze garantéieren a Gesellschaftsrankheiten, an där gëtt et der ëmmer méi, beschtméiglech ze bekämpfen. Den INAPS als Centre de compétences ass en extreem wichtegt Instrument fir d'Entwécklung vun der Qualitéit am Sport hei zu Lëtzebuerg. Et gëllt, de Sport, vum Fräizäit- an Hobbysport bis hin zum Héichleeschtungsport, zesumme mat all de verschiddenen Acteure virunzedeelen.

Zu de Missioun vum INAPS: D'Formatioun bleift e wichtegt Element an d'Kärkompetenz vum INAPS. An nëmme wa mer et endlech fäerdegbréngen, d'Beruf am Sport hei zu Lëtzebuerg anescht ze valoriséieren, wéi dat bis elo de Fall war, erreche mer mat der Professionalisatioun, déi mer virun e puer Méint hei an enger Motioun gefuerdert hunn, och eng Erhéijung vun der Qualitéit vun deem, um Terrain leeft. Hei kann den INAPS zu engem elementar wichtege Instrument ginn: den INAPS als Kompetenzzentrum, deen deene verschiddene Federatiounen, Ministère, Administratiounen an och Gemengen zur Verfügung steet, mam Zil, zesumme seier an effikass Konzepter ze entwéckelen an ëmzesetzen, déi zu engem aktiven a sportleche Liewenszil inspiréieren a féieren.

Ech wëll op dëser Plaz och d'Wichtigkeet vun didaktischem Material fir nohaltege Formatiounspolitik opmierksam maachen, och fir Blended Learning duerch d'Digitaliséierung vun didaktischem Material ze erméiglechen.

An der Kommissioun gouf och iwwer e BTS am Beräich vum Sportmanagement geschwat. Wou ass do de Projet drun? Sinn do schon Neel mat Käpp gemaach ginn? Oder anscheiters gefrot: Ass eng Decisioun gefall, wat fir e Lycée dat wäert ubidden? A wa jo, ab wat fir engem Schoujoer?

Et ass kruzial, dass méiglechst vill Leit vun de Kompetenzen aus dem INAPS kënnen profitéieren an der ongesonder Liewensweis vun eiser Gesellschaft kënnen

entgéintwierken. Zum Beispill gouf net méi spët wéi gëschter eng Etüd an der Fachzäitschrëft „The Lancet“ publizéiert, déi beschreift, dass am Joer 2050 viraussichtlech all sechste Mënsch op der Welt Diabetes kéint hunn, wat enger Verduebelung par rapport zu haut entsprécht.

Aner erschreckend Zuelen: 18 % sinn atteit d'obésité an 30 % leiden ënner kardiovaskuläre Krankheeten. Laut der WHO respektéieren 80 % vun den Adolescents scolarisés – 85 % Meedercher a 78 % Jongen – déi aktuell Recommendation vun enger Stonn Sport am Dag net. Well et ass och kloer a wëssenschaftlech bewisen, dass eng Aktivitéit physiqe déi kognitiv Weiderentwécklung a Sozialisatioun daitlech verbessert.

Dofir schéngt et eis als CSV evident, dass dat néidegt Personal plus de Budget aus der Fiche financière och zur Verfügung gestallt musse ginn, fir dass den INAPS dës grouss a wichteg Aufgabe meeschte kann. Et dierf op kee Fall op der falscher Plaz gespuert ginn an de Sport dierf net, wéi esou dacks, als Affer vun anere wichtege Projekte mat Grimmele getréischt ginn. Wa mer wierklech de Sport heibannen eescht huelen, da brauche mer méi wéi nëmme Grimmelen. Da brauche mer mindestens en zolidd Pond Brout, an dat am beschte mat ville gesonde Kären.

Mir als CSV fuerderen dofir weider Investissementer an de Sport hei zu Lëtzebuerg. An ech bleiwe bei menger Ausso vun der leschter Kéier: Net 1 %, mee 2 % vum Staatsbudget sollt d'Zil sinn, fir an d'Gesondheet vun de Leit ze investéieren!

Ech ginn domadder den Accord vun der CSV-Fraktioun a soen der Rapportrice villmools Merci fir de mëndlechen a schrëftleche Rapport. Merci och dem Direkter vun der INAPS (veuillez lire: vun der ENEPS) a weider bonne Chance.

**M. Fernand Etgen, Président** | Merci villmools, Här Mischo. Da wär et um honorabelen Här Claude Lamberty. Här Lamberty, Dir hutt d'Wuert.

**M. Claude Lamberty (DP)** | Här President, ech wäert elo net soen, mir sollen 3 % an de Sport ginn, mee ech ginn dem Här Mischo awer an deem Sënn scho Recht, dass méi Moyenen an de Sport musse kommen.

**Mme Nancy Arendt épouse Kemp (CSV)** | Do si mer wäit ewech!

**M. Claude Lamberty (DP)** | Do si mer, mengen ech, an den éischten zéng Sekonne schonn alleguerten heibannen eens.

Här President, eigentlech wollt ech ufänken an der Rapportrice – an dat wäert ech och elo maachen – e grouss Merci soe fir hire schrëftlechen an och ganz gudde mëndleche Rapport. Dofir merci der Madamm Cécile Hemmen. Dat erlaabt mer awer eigentlech och, quasi direkt op e puer Remarken iwwerzegoen, an ech muss net an den Detail vum Projet agoen.

Wa Reformen an der Sportpolitik, an dat vun der klengstméiglecher Beweegungserzéiung bei klengen Kanner bis hin zum Elitesport, ustinn, dann ass dat eigentlech eppes, wat mir als Demokratesch Partei ëmmer wëlle begreissen. Mam Gesetzesprojet, dee mer haut de Mëtteg stëmmen, maache mer e bedeiende Schrëtt an déi richteg Richtung, wat souwuel d'Förderung, d'Qualitéit, d'Demande, awer och wat d'Vue op de Sport insgesamt hei am Land ugeet.

Ech verroden näischt Neits: Mir brauche gutt opgestallt Veräiner, mir brauche gutt opgestallt Federatiounen, mir brauchen awer och gutt forméiert Leit um Terrain, déi an de Gemengen, an de Veräiner, an de Federatiounen aktiv sinn. A mir brauchen eng Plaz, wou sech drëm gekëmmert gëtt a wou

d'Koordinatioun zesummeleef, fir dass déi Leit an déi Kompetenzen, déi si brauchen, am Endeffekt och genau do ukommen, wou se gebraucht ginn. Dofir ass et och absolut richtig, dass mer aus der ENEPS den INAPS maachen.

D'ENEPS huet hiren Dénkscht déi lescht Joren, Joerzénge gutt gemaach. Mee genausou wéi d'Erausforderungen dagdeeglech quasi wuessen an och zum Deel ganz anerer gi sinn iwwert d'Zäit, sou ass et wichtig, Reformen anzeleeden, déi op dës Erausforderunge ganz konkret a passend Äntwerte kënnen ginn. Aus enger Schoul, déi grouss Meritten hat an der Sportgestaltung hei am Land – et war eng École nationale de l'éducation physique et des sports –, gëtt also elo e Kompetenz- an awer och e Ressourcenzentrum, deen als Zil huet, d'Qualitéit an d'Offer am Beräich vu Beweegung a Sport ze verbesseren.

Et ass mer op dëser Plaz wichteg ze ënnersträichen, dass d'Sportpolitik eng bedeiend gesellschaftspolitesch Roll an der Perceptioun vun der Demokratescher Partei spillt. De Sport stäerkt déi sozial Kohäsion vun eiser Gesellschaft doduerch, Wäerter wéi Toleranz a Gerechtkeet ze vermëttelen, Leit aus verschiddene Kulturen a sozialen Hannergrënn zesummenzebréngen an eng zentral Roll och an der Integratioun a Beweegung vu jonke Leit ze spillen.

De Sport stellt awer och ouni Zweifel d'Basis fir e gesond Liewen duer. Dofir ass et wichteg, och haut nach eng Kéier ze widderhuelen: All Euro, dee mer an de Sport investéieren, ass en Invest an d'Gesondheet vun der ganzer Gesellschaft!

Ganz wichteg fir d'DP ass, dass mer an der klenger Lëtzeburger Sportswelt mat allen Acteuren, déi mer hunn – an dozou zielen ech elo och ganz bewusst den COSL als extreem wichtege Partner –, eben zesummeschaffen, fir gemeinsam Ziler ze entwéckelen an duerno och ze errechen. D'Expertise aus dem Comité olympique zesumme mat de Spezialiste vum Terrain – eise Federatiounen, eise Veräiner –, geneesou wéi d'Strukturreform um Niveau vum INAPS kënnen derzou féieren, dass mer eis Sportpolitik am Land insgesamt wäerte kënnen stäerken.

Dofir ass et fir eis als Demokratesch Partei och esou wichteg, dass op kee Fall dierf eng Konkurrenzsituatioun entstoen, mee en Zesummeschaffen am Sënn vun der Entwécklung vum Lëtzeburger Sport. Reegelméisseg Treffen, fir zesummen ze koordinéieren, sinn an eisen Aen dofir extreem wichteg.

Här President, als DP begrësse mer ausdrécklech déi verschidde Changementer, déi den INAPS am Verglach zu der ENEPS mat sech bréngt. Ech denken hei ënner anere: den Developpement vun de Kompetenzen duerch Formatiounen, wat dat technesch an och dat administratiiv Personal ugeet; d'Ëmsetzung vum Konzept „LTAD – Lëtzebuerg leeft Sport“, och duerch d'Zesummenaarbecht mat verschiddenen ëffentlechen a privaten Acteuren; d'Berodung an d'Ënnerstützung fir interesséiert Ministère a Gemenge wéi och fir déi ganz Gesellschaft, déi Projeten am Zesummenhang mat kierperlecher Aktivitéit a Sport hunn; d'Entwécklung vun der „kierperlecher Alphabetiséierung“; d'Aus schaffen an d'Reglementatioun vu Formatiounen fir Sportsberuffer.

Här President, d'Zäit leeft fort, dofir kommen ech zum Schluss. De Beweegungsmangel féiert zu Iwwergewicht, zu net genuch kierperlecher Fitness bis hin zu manner Leeschtungsfaegkeet an ass natierlech am Laf vun der Zäit responsabel fir eng ganz Rei vu Krankheeten. Dofir sinn all méigleche Moyenen – an ech ënnersträichen: „all méigleche Moyenen“ – vun der Politik ze mobiliséieren, fir dass sech beweegt gëtt! Eigentlech eng Grondform vu Sportpolitik an eng primordial

wichtig Preventiionsmesur an der Gesondheetspoli-  
tick vun eisem Land!

An deem Sënn wäert dës Vott an déi deemtsprie-  
chend Erweiterung vun den Aufgabe vun dem INAPS  
mat all sengen neie Kompetenzen iwwer kierperlech  
Aktivitéit a Sport am Déngscht vun der ganzer Gesell-  
schaft dem Lëtzeburger Sport och zeguttkommen!

An deem Sënn ginn ech den Accord vun der DP-Frak-  
tioun. Ech soen Iech Merci.

**M. Fernand Etgen**, Président | Merci, Här Lamberty.  
An da geet d'Wuert un déi honorabel Madamm Josée  
Lorsché. Madamm Lorsché, Dir hutt d'Wuert.

**Mme Josée Lorsché** (déi gréng) | Villmools merci,  
Här President. Et ass kloer, dass och mir Gréng dës  
Projet de loi ënnerstëtzen, well e geduecht ass, fir dat  
wäit gefächert Gebitt vum Sport a vun der Bewegung  
an der Gesellschaft ze fërderen, der Entwécklung vum  
Sportssektor Rechnung ze droen an awer och nei  
Erausforderungen unzegoen, ugefaange bei de For-  
matiounen. Domat mengen ech virun allem emol den  
Ausbau vun de Formatiounen am Beräich vum Enca-  
drement vu Sportlerinnen a Sportler, mee och vu Kan-  
ner a Jonken, an den Opbau vun neie Kompetenzen an  
deem Beräich.

Hei wëll ech virun allem begreifen, dass d'Forma-  
tioun zum Educateur en pédagogie des activités  
socio-sportives agefouert gëtt. Dës Profil gëtt et  
schonn an anere Länner an ech denken an ech sinn  
och iwwerzeugt, dass dee Beruff och zu Lëtzebuerg  
eng grouss Plus-value wäert duerstellen an deem ge-  
samte Bildungssektor.

Dës Formatioun, déi jo am LTPES ugebuede wäert  
ginn, ass net un de Leeschtungsport gebonnen.  
Villméi stäerkt se déi wichteg sozial an erzieheresch  
Fonction vum Sport als Motor vun der perséinlecher  
Entwécklung, vun der Integratioun a vum sozialen  
Zusammenhalt scho bei deene Jéngsten. Gläichzäit-  
teg bitt dës Formatioun awer och sportbegeeschte  
Jonken, déi am edukative Beräich wëlle schaffen, eng  
ganz interessant beruflech Perspektiv. An dat be-  
grësse mer wierklech ausdrécklech, Här Minister.

Eng zweet grouss Plus-value vun dësem Projet de  
loi gesi mer an der Stärkung vun de Veräiner an de  
Federatiounen duerch eng besser Formatioun vun den  
techneschen an administrative Kaderen, natierlech  
ënnert der Konditioun, dass genuch Benevoller zur Ver-  
fügung stinn a bereet sinn, d'Formatioun nieft hirer  
beruflecher Aktivitéit och ze maachen, well et ass jo  
net esou, dass am Sportssektor jiddwereen haaptbe-  
rufflech ënnerwee ass. Déi meescht, déi do ënnerwee  
sinn, si Benevoller, an dofir ass et an deem Sënn och  
wichtig a weiderhin néideg, de Benevolat am Sport ze  
ënnerstëtzen an ze stäerken. Dat wäert e groussen Defi  
bleiven.

En drëtten Punkt, deem ech am Kontext vun dësem  
Projet de loi ganz wichteg fannen, betrëfft d'Zesum-  
menaarbecht vum zukünftigen INAPS mat de Fede-  
ratiounen, den öffentlechen Partner, der Uni, de Schou-  
len, den Héichschoulen a besonnesch dann awer och  
de Gemengen, déi vum INAPS berode kënnen ginn.  
Well wat d'Förderung vun der Bewegung an der Ge-  
sellschaft ugeet, spillen d'Gemengen an eisen Aen eng  
ganz grouss Roll, an déi soll net ënnerschätzt ginn.  
Dofir si mer frou, dass d'Roll vun de Gemengen an der  
Lescht méi thematiséiert gëtt.

Et ass nämlech un de Gemengen, hir urban Entwéck-  
lung esou auserichten, dass d'Bewegung am öffent-  
lechen Raum net ze kuerz kënn a genuch Platz fënn. An  
ech denken hei net just un déi traditionell Fitnesspar-  
coursen, déi mer all kennen, oder Fräizäitzonen, wou  
Mënsche sech beweegen, ech denken och net just u

Spillplaz fir Kanner. Ech denken éischter un déi inno-  
vativ urban Fräiraum fir net organiséierte Sport, Spill  
a Bewegung, déi d'Mënsche vun alle Generatiounen  
zesumebriengen an d'Bewegung op déi villfältegst  
Manéieren attraktiv an ofwieslungsräich maachen,  
dës virun allem um Hannergrond vun der Warnung  
vun der WHO, dass d'Mënschen, virun allem déi Jonk  
an d'Kanner, sech net genuch beweegen; et ass oft ge-  
nuch ënnerstrach ginn.

Et gëtt gesot, weltwäit gëtt sech net emol eng Stonn  
an der Moyenne beweegt. Mee ech mengen, och zu  
Lëtzebuerg hu mer méi Bewegung néideg. Dass de  
Bewegungsmangel eng vun den Haaptursachen fir  
Obesitéit, kardiovaskulär Krankheeten, Diabetes, ortho-  
pedesch Problemer an Haltungsschied ass, ass keng  
nei Erkenntnis. Dat ass scho jorelaang erkannt. An et  
ass och net nei, dass de Bewegungsmangel als Zivi-  
lisationskrankheet bezeechent gëtt, mat engersäits  
grave gesondheetleche Konsequenzen op d'Liewe vum  
Eenzelen an anersäits awer och héije Käschte fir eise  
Gesondheets- a Sozialsystem.

Dir Dammen an Dir Hären, an awer, wéilt ech fir of-  
zeschlësse virun enger gewëssener Schwaarzmolerei  
warnen, well och wa vill Bewegungsmangel an eiser  
Gesellschaft en Thema ass a vill dovun geschwat gëtt,  
däerfe mer awer net vergiessen, dass Dausende Kanner  
a Jonker an eise Sportsveräiner mat Begeeschterung  
Sport dreiven. An dat soll een ëmmer erëm ënnersträ-  
chen, fir de Sport och emol positiv duerstellen.

Net alle Kanner geet et dobäi ëm grouss Leeschtun-  
gen. Et geet hinnen ëm d'Bewegung an ëm d'Freed,  
déi se dobäi empfangen. An ech sinn iwwerzeugt: Dës  
Kanner a Jonker liwweren de Beweis, dass Bewee-  
gung e Grondbedürfnis ass, wat d'Selbstännegkeet,  
d'Selbstbewusstsein an d'Gesondheet stäerkt, wat  
d'Wuelbefanne steigert a Frëndschaften schafft. Dës  
Kanner liwweren de Beweis, dass d'Welt vun de Kan-  
ner a Jonken eigentlech eng Bewegungswelt misst  
sinn.

Mat dësem Projet de loi laude mer déi Revolutioun  
sécher net an a mir änneren och just zwee Busch-  
tawen: Am Numm vun der Institution ENEPS komme  
mer zu INAPS. Mir droen duerch déi nei Missiounen,  
déi d'Institution kritt, awer massiv zu der Stärkung  
vun der Bewegungs- a Sportswelt bäi. An dofir gi  
mer ganz gären den Accord vun der grénger Frak-  
tioun a mir soen der Rapportrice Cécile Hemmen na-  
tierlech e grouse Merci fir hiren extensiven a gudde  
Rapport.

**Plusieurs voix** | Très bien!

**M. Fernand Etgen**, Président | Merci villmools, Ma-  
damm Lorsché. An d'Wuert ass elo fir den honorabelen  
Här Jeff Engelen. Här Engelen, Dir hutt d'Wuert.

**M. Jeff Engelen** (ADR) | Merci, Här President. Léif  
Kollegeginnen a Kollegen, fir unzefänken der Ma-  
damm Cécile Hemmen en häerzleche Merci fir dee  
schrëftlechen a mündlechen Rapport. Et ass scho villes  
gesot ginn. Et ass ëmmer wichteg, dass ee sech der  
Zäit upasst an der Realitéit Rechnung dréit. Esou ass  
et och am Sport an och a villen anere Beräicher. Elo si  
mer haut hei zesummekomm, fir aus der ENEPS, déi  
bis elo ëmmerhi joerzengtelaang fonctionéiert huet,  
en INAPS ze maachen. Dat ass am Fong geholl: Vun  
der Sportsschoul gi mer elo eriiwwer zu méi Aktivitéi-  
ten am Sport, wat ëmmer ze begreifen ass.

Een nationaalt Institut gouf elo gegrënnt oder gëtt  
an d'Liewe geruff, mat erweiderte Missiounen, wat  
ze begreifen ass. Mee et muss een awer och op  
där anerer Säit dann oppassen, dass een net op där  
anerer Säit och uneckt, wann ee riets a lénks déi eng  
oder aner Kompetenz erweidert. Duerfir wëll ech  
eng kleng Remark hei opgräifen, an zwar: De COSL

begrësst zwar staark de Wëlle vun den öffentlechen  
Autoritéiten, fir dem Sport zousätzlech Mëttelen a  
virun allem en Zenter vu Kompetenzen a Ressourcen  
zur Verfügung ze stellen, e stellt awer och fest, dass et  
néideg ass, d'Roll an d'Verantwortung vun INAPS a  
COSL kloer ze definéieren.

Dofir hunn ech och an deem Sënn eng Fro un den Här  
Minister: Wéi sinn d'Krittären tëschent deenen zwee  
Organer, fir dat ze differenzéieren? Well, ech mengen,  
et muss een och kloer Kompetenzen an deem Beräich  
schafen.

An dann zum Schluss wéilt ech nach soen: All Euro,  
dee mer an de Sport investéieren, dee brauche mer  
herno manner an d'Gesondheet ze investéieren.  
Duerfir begreisse mer all Euro, deen an de Sport  
kënn. Ech bréngen duerfir d'Zoustëmmung vun der  
ADR zu dësem Gesetz.

Ech soen Iech Merci fir Är Opmierksamkeet.

**Une voix** | Très bien!

**M. Fernand Etgen**, Président | Merci, Här Engelen. An  
da geet d'Wuert un d'Madamm Nathalie Oberweis.

**Mme Nathalie Oberweis** (déi Lénk) | Merci, Här  
President. Och e grouse Merci der Rapportrice. Mir  
stëmmen d'Schafung vum INAPS mat, well et sech  
dobäi ëm e wichtige Piler bei der Ëmsetzung vun der  
Strategie „Lëtzebuerg leeft Sport“ handelt a mir déi an  
hire groussen Zich interessant fannen. Et ass evident,  
dass Sport a kierperlech Betätigung am Allgemenge  
fir den Eenzelen, mee och fir d'Gesellschaft als Ganz  
immens wichteg sinn. Et ass jo och kee Geheimnis,  
dass d'Wuelbefanne an d'Gesondheet domadder  
verbessert ginn an déi kierperlech a mental Resilienz  
och vun all Eenzelem sech zesumme mam Sport an  
der Kooperatioun, der Solidaritéit, der Entraide ver-  
mëttelen an och stäerken. Mir kënnen dat nëmmen  
ënnerstëtzen.

Dass den INAPS elo eeben och als Missioun kritt, méi  
dodrop ze schaffen, fir Formatiounen an Offeren ze ent-  
wëckelen, déi d'Inklusioun an den Zougang zum Sport  
fir all Liewensabschnitter a besonnesch ab dem jonken  
Alter solle fërderen, geet fir eis natierlech an déi rich-  
teg Richtung. Wéi mer virun e puer Méint op dëser  
Plaz während enger Debatt iwwert d'Sportsstrategie och  
scho soten, si Sport a kierperlech Betätigung awer och  
kee Wonnermëttel an enger Gesellschaft, déi ëmmer  
méi ongläich gëtt. Wann d'OMS feststellt, dass ëmmer  
manner Sport gemaach gëtt, besonnesch bei deene  
Jonken, mat alle kierperlechen a mentale Problemer,  
déi domadder verbonne sinn, dann huet d'Entwéck-  
lung jo och eng sozial Dimensioun.

Mir géifen et wichteg fannen, wann an dësem Zesum-  
menhang méi staark dru géif geduecht ginn, dass och  
Kanner a Leit am Allgemenge aus sozial defavoriséier-  
te Klassen an der Gesellschaft d'Méiglechkeet, fir Sport  
ze maachen, méi notzen a méi notze kënnen. Wann  
Donnéeën iwwert dës Problematik feelen, da wier et  
an eisen Aen un der Zäit, fir dat wëssenschaftlech op-  
zeschaffen.

Kierzlech huet e Kannerdokter op enger Konferenz  
vun der Caritas zum Thema Aarmut a Gesondheet  
ënnerstrach, awéiwäit Kanner aus sozialekonomesch  
benodeelegte Milieuen un Iwwergewicht an domat  
verbonnene Krankheete leiden. Do kann een dann och  
un d'Aarbechtszäitverkürzung denken oder och besser  
Aarbechtsbedéngungen, spréich Mindestlounerhéijung  
fir d'Elteren, Erhéijung vum REVIS och eventuell. Well  
wann d'Eltere sech nämlech u sech musse vrecktschaf-  
fen, fir iwwert d'Ronnen ze kommen, fir hire Loyer ze  
bezuelen, fir hire Prêt ze bezuelen, a keng Zäit hunn,  
keen Espace hunn, fir hir Kanner lénks a riets an déi  
verschidden Aktivitéiten ze kutschéieren, dann hunn

d'Kanner effektiv och net déi Méiglecheet wéi anerer eventuell, fir kënnen u sportlechen Aktivitéiten deelze-huelen.

Et geet also iwwert d'Kanner eraus. Mir schwätzen dann och iwwert den Elteren hiren Espace, fir kënnen dee Kader ze setze fir hir Kanner. Do geet sensibiliséieren net duer. D'Eltere mussen déi konkret Méigleche-keiten, also materiell Bedéngunge kréien, fir eebe kënnen dee Spurt, deen Espace ze hunn, fir hire Kan-ner déi Konditiounen u sech ze erlaben.

Eng aner Bedéngung, fir dass Sport ka gemaach ginn, ass natierlech d'Verfügbarkeet vun deene passenden Infrastrukture fir de Breesdesport. Ech denken un éischer Stell och u Schwämmen, vun deenen et der definitiv net genuch an eise Land gëtt. Net fir näischt gi vill Schoulklassen nëmmen all zweet Woch schwammen. Vill grouss Gemengen hu guer keng. Anerer, wéi Esch, hu just eng, an och keng oppen. D'Stad Lëtzebuerg huet och keng oppe Schwämm.

Et gëtt jo och dee wonnerbare Site vun der Gante-beensmiller, dee jo privatiséiert ginn ass, deen zwar um Site oder um Territoire vun der Gemeng Hesper ass, mee do kéint ee jo vläicht iergendwann eng Kéier un eng Grenzbegradeung mat der Gemeng Lëtze-buerg denken an da kéint d'Gemeng Lëtzebuerg jo vläicht dee Site entwéckelen. Mee do muss een da mat der Buergermeeschtesch respektiv mat de Buerger-meeschtere schwätzen.

Villmools Merci.

**M. Fernand Etgen**, Président | Merci villmools, Ma-damm Oberweis. An als leschte Riedner steet den ho-norabelen Här Sven Clement prett.

**M. Sven Clement** (Piraten) | Merci, Här President. Léif Kollegeinnen a Kollegen, fir d'éischt soen ech dem Cécile Hemmen Merci fir de gudde mëndlechen a schrëftleche Rapport. Jo, de Sport! Jidderee vun eis huet mindestens eemol a sengem Liewe schon eng Kéier héieren, wéi wichteg Sport fir de Mënsch ass.

**Une voix** | Nee, dat ass nei.

**M. Sven Clement** (Piraten) | Ech hunn Iech elo net gesot: „Jidderee vun eis huet eng Kéier Sport ge-maach“, well ech si mer net honnertprozenteg sécher, datt dat géif zoutreffen. Mee jidderee vun eis huet awer schon dovun héieren, datt et wichteg ass. An trotzdeem ass et an eiser Gesellschaft och esou, datt vill ze vill Leit sech net genuch beweegen. Vu Sport, zum Beispill an engem Grupp oder an de Veräiner, schwätze mer do nach guer net, do schwätze mer mol scho just vun akutem Bewegungsmangel.

Zum Bewegungsmangel geselle sech dann ëmmer méi Vollekrankheete wéi Iwwergewicht, Häerz-kreislafkrankungen oder Diabetes. An et geet net duer, just op medezinneschem Niveau op dës Evolu-tiounen ze reagieren. Do ass d'Bewegung – a jo, de Sport – e wichtige Schlëssel, fir géint dës Evolutiounen virzegoen. Dowéinst gëllt et hei, méiglechst fréi unze-setzen, also scho bei de Kanner.

Elo kann e Mënsch sech natierlech och eleng beweegen, mee mir mussen och do usetzen, wou d'Mën-sche sech ophalen. Bei de Kanner sinn dat d'Schoule respektiv d'Betreiungsstrukturen, wou se vill Stonne pro Dag ënnerwee sinn. Et geet awer net duer, fir ein-fach de Sport oder d'Bewegung op de Stonneplang ze schreiwen. Nee, d'Personal, dat dës Aktivitéit mat de Kanner mécht, muss entsprechend qualifizéiert sinn. An do komme mer da bei dësem Gesetz.

Hei spillt nämlech dann och d'Entwécklung vu moto-resche Fäegkeeten eng Roll. Et ass also net egal, wéi ee sech beweegt. Huet dat elo net als Appell, Iech einfach net ze beweegen, well Der Angscht hutt, Iech

falsch ze beweegen, mee huet et als Appell, wann Der Iech beweegt, Iech de préférence richteg ze be-weegen!

Dat gëllt dann net nëmme fir d'Personal an de Be-treiungsstrukturen an an der Schoul, dat jo souwisou scho staatlech forméiert gëtt, mee och d'Veräiner an d'Federatiounen sinn drop ugewisen, fir gutt Personal, zum Beispill Traineren, ze fannen. Dozou gehéieren dann natierlech och Lizenzen a Formatiounen. Well nëmmen esou kënnen mer sécherstellen, datt d'Quali-téit vun der Offer, déi mer wëllen, och stëmmt. An dat féiert dann och erëm bei den INAPS.

Aus der École nationale de l'éducation physique et des sports, der ENEPS, wéi se haut nach heescht, gëtt dann den Institut national de l'activité physique et des sports. Et soll hei awer net just ëm dee Wiessel vum Numm goen, mee och d'Aktivitéit sollen aus-gebaut ginn. A genau dat kënnen mer nëmme begrei-sen: datt d'Aktivitéiten ausgebaut ginn. Wéi schonn uewe gesot, brauche mer qualifizéiert Personal an eng entsprechend Offer u Formatiounen, fir dann och déi Traineren ze forméieren. „Train the trainers“, kann ee bal soen.

Eng weider wichteg Missioun vum INAPS ass den na-tionale Register vun de Brevet an den nationalen Homologatiounen respektiv den accordéierten Dis-pensen. Dat ass insofern wichteg, datt dat jo an eng ganz Rëtsch vun anere Projete respektiv Aktivitéit vum Staat eraspillt, wou haut scho Federatiounen res-pektiv déi eenzel Sportveräiner mat zum Beispill dem Qualité+ (ndlr: subside Qualité+ pour clubs sportifs affiliés auprès d'une fédération sportive agréée) mam Staat ze dinn hunn.

Fir eis huet dann de Projet – an do ralliéieren ech mech dem COSL – just ee kleng Bemoll, well mir gesinn et och kritesch, datt eng finanziell Participatioun fir eng Formatioun am Ausland just da méiglech ass, wann et hei am Land keng identesch oder zumindest an Deeler identesch Formatioun vum INAPS gëtt. Wéi dat ge-nau an der Praxis herno ëmgesat gëtt, wéi komplézi-ert dat gëtt nozeweisen, datt hei eng Formatioun net identesch ass oder deelidentesch ass, dat ass eng Fro, déi ech mer haut stellen, wou ech och dem INAPS wëll d'Chance ginn ze weisen, datt dat kee bürokratesch Waasserkapp gëtt, mee datt een do relativ einfach Léisungen am Sënn vun den Trainerinnen an Trainer fënnt, well déi hu jo och deelweis net ëmmer de ganze Curriculum direkt bei Hand.

Natierlech ass et aus enger Rei Grënn favorabel, wa méiglechst vill Formatiounen hei ugebuede ginn. Dofir sollte mer och probéieren, eis Offer souwäit et geet auszubauen. Mee mir sollten de Leit um Terrain och de Choix loossen, wéi eng Formatioun fir si spezi-fesch am beschte passt. An och e méi groussen an internationale Kader kann hei duerchaus nei Iddien oder Perspektive bidden. Mir sollten eis deem also net verschléissen.

Trotz deem kleng Bemoll gesi mer ganz vill positiv Punkten a ginn deementspreechend och eisen Accord. Ech soen Iech Merci.

**M. Marc Goergen** (Piraten) | Ganz gutt!

**M. Fernand Etgen**, Président | Merci villmools, Här Clement.

D'Regierung huet d'Wuert, den Här Sportsminister Georges Engel.

#### *Prise de position du Gouvernement*

**M. Georges Engel**, Ministre des Sports | Här Presi-dent, Dir Dammen an Dir Hären, fir d'éischt emol e grouse Merci dem Cécile Hemmen fir säi mënd-lechen a schrëftleche Rapport. Dann e grouse Merci

un Iech allegueren heibannen, well wann ech richteg nogelauschtert hunn, da wäert dat heiten eng Ee-stëmmegkeet gi bei dësem Gesetz.

All Fraktioun huet dësem Projet zougestëmmt. An dat ass och gutt esou, well national an international Etü-den hu beluecht, wéi dramatesch d'Situatioun awer ass. An et ass net iwwerdräiwene, dass ee seet, dass de Sport- an de Bewegungsmangel d'Epidemie vum 21. Joerhonnert ass. An dat wäert kuerz-, mëttel- a laang-fristeg awer eng ganz Rei Konsequenzen op eis mental a physisch Gesondheet hunn, et wäert Konsequenzen op eis Gesondheetskeess an op eise Gesondheetssys-tem hunn. Et gëtt also héich Zäit, dass mir als Land verstärkt an d'Entwécklung vum Sport investéieren an der Sports- a Bewegungspolitik déi Prioritéit ginn, déi se brauch, fir deem entgéintzewirken.

Ech héieren heibannen dacks – an dat war an deene leschten Debatten allkéiers de Fall –, datt all Mënsch sech heibannen eens ass, dass muss méi an de Sport investéiert ginn. Ech wëll, dass mer deene Wieder dann och „Taten folgen lassen“, wéi een dann esou op Däitsch seet, dass mer eis dann och allkéiers un dat, wat mer hei gesot hunn, erënneren an dat dann an deene richteg Momenter och kënnen ëmsetzen. Well Sport a Bewegung, dat kann enorm vill Positives an eiser Gesellschaft bewirken – an der mentaler an der physischer Gesondheet natierlech, awer och um Niveau vum Zesummeliewen a vun der Vermëttlung vu Wäerter, déi fir eis Gesellschaft wichteg sinn.

An dësem Sënn stellt den „LTAD – Lëtzebuerg leeft Sport“, dee mer zesumme mam COSL lancéiert hunn, e ganzheetlech Sportskonzept fir Lëtzebuerg duer an huet dann natierlech och eng ganz Rei vu Schnëttstel-len: mat Bildung, mat Kandheet, mat Jugend, mat Senio-ren, mat Fräizäit, mat Inklusioun, mat Integratioun a mat Gesondheet. An de Sport schléit do Brécken tëscht de Mënsche vun ënnerschiddlecher sozialer a kulturel-ler Hierkonft an hëlleft, Virurteeler ofzubauen, Minori-téiten ze integréieren a Wäerter ze vermëttelen.

Do brauche mer alleguer d'Acteuren. An – virdrun huet d'Josée Lorsché et gesot – jo, och d'Gemenge sinn do e ganz wichtigen Acteur, net nëmme wat d'Infrastrukturen ugeet, mee alles: dat normalt Be-weegen, déi normal Amagementen vun enger Ge-meng, woufir d'Gemengen zoustänneg sinn.

An de Sven Clement huet et gesot: Jo, et ass net egal, wéi ee sech beweegt. An der falscher Intensitéit a mat engem iwwerdräiwene Volume ka Sport och schied-lech sinn oder negativ Konsequenzen op eis Gesond-heet hunn. Dofir ass et ëmsou méi wichteg, dass mer en uerdentleche Kader schaffen, well Sport kann och ausgrenzen, Sport kann diskriminéieren, a wann e pedagogesch schlecht enseignéiert ass, kann en och zu engem negative Selbstbild vun de Kanner, Jugend-lechen oder Erwuessene bäidroen.

A genau dofir – genau dofir! – schafe mer haut deen Ins-titut, dee sech op allen Eebene fir d'Qualitéitsentwéck-lung am Lëtzeburger Sport wäert asetzen an deen zesumme mat den Acteuren am Sport, den Dirigenten, den Traineren, de Sportsproffen, den Enseignanten an den Educateuren an natierlech och den Elteren, esou agéiert, dass d'gesellschaftlech an d'gesondheetlech Potenzial vu Sport a Bewegung voll zur Geltung kom-men.

Den INAPS – an ech soen elo net, wéi e ganz aus-geschat heescht – wäert also d'Missioun hunn, d'Sportsfederatiounen, d'Gemengen, d'Verwaltungen an d'Ministèren ze beroden a si ze ënnerstëtzen, wann et drëms geet, qualitativ héichwäerteg Konzepter a Programmer am Beräich vum Sport an der Bewegung auszeschaffen an dës duerno dann och ëmzesetzen. Et ass an deem Sënn eng Ulafstell fir déi genannte

Partner, als ee Kompetenz- a Ressourcenzenter eebe fir Sport a Beweegung. Dat erlaabt et dann och de multiplen Acteuren an eiser Gesellschaft, fir méi séier a méi effikass Programmer a Konzepter a Kohärenz mat der Sportsphilosophie „Lëtzebuerg lieft Sport“ ze erstellen an och unzibidden.

An zesumme mat den Hiewelen, déi de Sportsministère duerch seng Subsidien an der Hand huet, fir zum Beispill Sportsinfrastrukturen ze realiséieren oder d'Atellung vu Personal ze férdere, sinn ech dovun iwwerzeegt, dass entscheidend Akzenter an der Sportsentwicklung hei gesat kënne ginn, ouni datt d'Autonomie an de Fonctionnement vun de Fédérations an Fro gestallt ginn.

Ech ginn och dervun aus – an den Här Clement huet et gesot –: Jo, déi Ausbildungen, déi net hei zu Lëtzebuerg ugebuede ginn, déi kann een dann am Ausland maachen. Ech mengen, datt do d'Experience vun där nächster Zäit eis wäert déi richteg Renseignement ginn. Ech fannen et awer richteg, dass mer fir d'éischt kucken, wat mer hei zu Lëtzebuerg kënnen ubidden, an dass mer net duerch d'ganz Welt solle reesen, wann et eng Formatioun gëtt, déi s de och hei zu Lëtzebuerg kéints maachen. Mee ech mengen, dass d'Experience an den nächste Wochen a Méint eis do wäert hëllefen.

Nieft der Berodung fënnt d'Qualitéitsentwicklung awer och duerch d'Formatiounen vun deenen einzelnen Acteuren statt. Den INAPS ass fir d'Trainerausbildung och hei déi richteg Plaz, fir dann och d'Cadres administratifs, déi dann och den Dirigeants vun de Strukturen am Sport responsabel sinn, déi richteg Plaz (veuillez lire: Den INAPS ass grad ewéi fir d'Trainerausbildung dann och déi richteg Plaz fir d'Formatioun vun de Cadres administratifs, déi dann och als Dirigeants vun de Strukturen am Sport responsabel sinn). Den INAPS ënnerstëtzt als Kompetenzzenter déi verschidden Institutiounen vun der Education nationale an der Héichschoul, fir am Beräich Sport a Beweegung d'Entwicklung vun de Formatiounen séier an effizient opzebauen an och ëmzesetzen.

An hei géif ech da gär op d'Fro vum Här Mischo agoen, wat de BTS Sportmanagement ugeet. Ech sinn net bei all deenen Diskussiounen, well dat jo och en Deel Education ass, mat derbäi. Ech weess, datt et do awer Diskussiounen gëtt. Mee menges Wëssens ass do nach keng definitiv Decisioun gefall. An ech sinn iwwerzeegt, wann déi Decisioun bis gefall ass, dass Der dat dann och direkt matgedeelt kritt.

Eng ganz wichteg nei Missioun ass natierlech och dann d'Definitioun an d'Entwicklung vun de Beruffer am Sport a fir och hir Formatiounen ze ënnerstëtzen, fir dass de Secteur vum Sport sech hei zu Lëtzebuerg och qualitativ héichwäerteg professionaliséieren an entwéckele kann. Dir wësst, ech si wierklech der Meinung, dass et hei net laanscht eng op d'mannst emol deelweis Professionalisatioun geet, an dat besonnesch am Fédérations- an am Veräinssport.

Fir dass d'Zesummenaarbecht INAPS a Fédérations optimal klappt an esou d'Qualitéitsentwicklung vun der Offer an de Veräiner Hand an Hand zesumme promouvéiert ka ginn, mussen d'Strukture vun de Fédérations natierlech och gestärkt ginn. A fir de Fédérations an deem Sënn eng Handlungsméiglechkeet ze ginn, hu mir zum Beispill de Poste vum Chargé de développement et de formation geschaf. Fir déi Formatiounen kann een also eng finanziell Ënnerstëtzung vum Sportsministère ufroen. An duerch eng enk Zesummenaarbecht mam INAPS kënnen hir Besoinen a puncto Berufsprofiler quantitativ a qualitativ opgeschafft ginn, fir esou de Secteur vum Sport nohalte ze professionaliséieren. Dat muss natierlech dann och an der Zukunft weider geféiert ginn.

Den Invest an dësen Institut huet natierlech eng gewëssen Envergnung – ech wëll déi och net klengspillen –, souwuel wat de Budget wéi och wat d'Personalkäschten ugeet. Mee deen Invest an d'Qualitéitsentwicklung gëtt awer dréngend gebraucht. Ech hu virdru gesot: Mir kënnen net nëmmen dovunner schwätzen, mee mir mussen och do Suen investéieren. Déi Moyene brauche mer onbedéngt. Ech sinn iwwerzeegt, dass den INAPS vill derzou bäidroen wäert, dass de Sport an d'Beweegung sech hei zu Lëtzebuerg qualitativ wäerten héichwäerteg entwéckelen an datt de Bewegungsmangel gesamtgesellschaftlech an alle Liewensofschnëtter, vu Kleng bis Grouss, wäert kënne bekämpft ginn.

Dann nach d'Äntwert op eng Fro vum Här Lamberty: Natierlech hu mir reegelméisseg Kontakt mam COSL. Et ass jo evident, dass mer dat reegelméisseg maachen. Mee natierlech ass et och kloer fir eis, dass eng Administratioun vum Sportsministère och hir eege Missionen muss hunn an och hir eegen Daseinsberechtigung an och hir eege Politik – wann ech dat emol kann esou soen – muss kënne verfolge. An dat wäerten déi och maachen. Ab September 2023 wäerten dann och d'Sportseducateuren hir Ausbildung kréien. Dir wësst, dass mer dee Projet do och scho virgestallt hunn.

Da war nach eng lescht Fro vum der Madamm Oberweis, oder et ware Remarken, wat déi sozial Mesuren ugeet. Ech kann Iech do nëmme Recht ginn, wat déi sozial Mesuren ugeet, dass, wa mer d'Leit stäerken, fir datt se kënne mat hire Kanner Sport maachen, dass dat alles eng richteg Saach ass. An deenen nächsten Deeg wäerte mer och hei de Fënnfjoresplang, wat d'Sportsinfrastrukturen ugeet, kënne stëmmen. 135 Milliounen wäerten do an deenen nächste fënnf Joer dann investéiert ginn. Ech mengen, dass et wichteg ass, datt mer déi richteg Infrastrukturen hei zu Lëtzebuerg dann och hunn.

Merci fir d'Nolauschteren.

**Une voix | Très bien!**

**M. Fernand Etgen, Président |** Merci dem Här Sportsminister Georges Engel. D'Diskussioun ass ofgeschloss.

Mir kommen elo zur Ofstëmmung iwwert de Projet de loi 8090. Den Text steet am Document parlementaire 8090<sup>5</sup>.

**Vote sur l'ensemble du projet de loi 8090 et dispense du second vote constitutionnel**

D'Ofstëmmen fänkt un. Mir maachen de Vote par procuration. De Vott ass ofgeschloss.

De Projet de loi ass mat 60 Jo-Stëmmen eestëmmegeg ugeholl.

*Résultat définitif après redressement : le projet de loi 8090 est adopté à l'unanimité des 59 votants.*

*Ont voté oui : Mmes Diane Adehm, Nancy Arendt épouse Kemp, MM. Emile Eicher, Félix Eischen, Paul Galles, Léon Gloden, Jean-Marie Halsdorf, Mme Martine Hansen, MM. Max Hengel, Aly Kaes, Marc Lies, Mme Elisabeth Margue, M. Georges Mischo, Mme Octavie Modert, MM. Laurent Mosar, Gilles Roth, Jean-Paul Schaaf, Marc Spautz (par M. Laurent Mosar), Claude Wiseler et Michel Wolter ;*

*Mme Barbara Agostino, MM. Guy Arendt, André Bauler, Gilles Baum, Mme Simone Beissel, MM. Frank Colabianchi, Fernand Etgen, Gusti Graas, Mme Carole Hartmann, MM. Pim Knaff, Claude Lamberty et Mme Lydie Polfer (par M. André Bauler) ;*

*Mme Simone Asselborn-Bintz, M. Dan Biancalana (par Mme Cécile Hemmen), Mmes Tess Burton, Francine Cloeser (par Mme Simone Asselborn-Bintz), MM. Yves*

*Cruchten, Mars Di Bartolomeo, Mme Cécile Hemmen, M. Dan Kersch (par M. Yves Cruchten), Mme Lydia Mutsch et M. Carlo Weber ;*

*Mme Semiray Ahmedova, M. François Benoy, Mmes Djuna Bernard, Stéphanie Empain, Chantal Gary, M. Marc Hansen, Mme Josée Lorsché, M. Charles Margue et Mme Jessie Thill ;*

*MM. Jeff Engelen, Fernand Kartheiser, Fred Keup et Roy Reding (par M. Jeff Engelen) ;*

*MM. Sven Clement et Marc Goergen ;*

*Mmes Myriam Cecchetti et Nathalie Oberweis.*

Freet d'Chamber d'Dispens vum zweete Vote constitutionnel?

(Assentiment)

Et ass also esou decidéiert.

## **11.8135 – Projet de loi relative à la construction et à l'équipement d'un centre sportif à Belval, et à l'aménagement des alentours**

Den nächste Punkt um Ordre du jour vun haut de Mëtten ass de Projet de loi 8135 iwwert de Bau vun engem neie Sportszentrum um Belval. D'Riedezäit ass nom Basismodell festgeluecht. An d'Wuert huet elo d'Madamm Rapporteuse vun dësem Projet de loi, déi honorabel Madamm Chantal Gary.

**Rapport de la Commission de la Mobilité et des Travaux publics**

**Mme Chantal Gary** (déi gréng), rapportrice | Merci, Här President. Kolleginnen a Kollegen, Här Minister, am Projet de loi 8135 geet et ëm e Finanzéierungsgesetz fir de Bau vun engem Sportkomplex inklusiv sengen Alentouren um Belval. De virleiende Projet soll d'Regierung also ermächtigen, um Site Belval-Ouest en neie Sportzentrum fir e Maximalmontant vun 114,32 Milliounen TTC ze bauen, an dëst wéi ëblech mat enger semestrieller Adaptatioun vum maximale Käschtepunkt en fonction vun der Variatioun vum Baupräisindex. D'Konstruktioun vum Gebai, d'Équipement souwéi den Aménagement vun den Alentouren gi vum Fonds Belval realiséiert.

D'Implantatioun an d'Konstruktioun vun dësem Centre sportif hu sech an éischter Linn duerch de Besoin u Sportinfrastrukturen, deen duerch d'Uni Lëtzebuerg souwéi weider schoulesch Etablissementen an der Gégend entstanden ass, erginn. De Sportkomplex wäert haaptsächlech fir d'Lycéeën an d'Grondschoulen aus der Regioun souwéi fir d'Uni Lëtzebuerg zur Verfügung stoen. Allerdéngs kënne fräi Plagen och vun de Fédérations, de Sportsveräiner oder fir Trainerformatiounen an Usproch geholl ginn.

(Brouhaha)

De Programme de construction gouf zesumme vum Educatiounsministère, ...

**M. Fernand Etgen, Président |** Ech maachen nach eng Kéier de selwechten Appell: Et wier gutt, wann et esou wier, datt d'Madamm Gary dierft am haartste schwätzen.

**Mme Chantal Gary** (déi gréng), rapportrice | Merci.

De Sportkomplex wäert haaptsächlech fir d'Lycéeën an d'Grondschoulen aus der Regioun souwéi fir d'Uni Lëtzebuerg zur Verfügung stoen. Allerdéngs kënne fräi Plagë vun de Fédérations, de Sportsveräiner oder fir Trainerformatiounen an Usproch geholl ginn. De Programme de construction gouf zesumme vum Educatiounsministère, dem Ministère fir Enseignement supérieur et de la Recherche an dem